

Inissianik attartortitsisarneq pillugu Inatsisartut peqqussutaata allangortinneqarnera pillugu Inatsisartut peqqussutaat nr. 14, 20. november 2006-imeersoq (Inissiamik tigusinissamut ukiuni arfineq marlunni najugaqarsimasussaataaneq pillugu maleruagassanik allannguineq, inissiat piginneqatigiilluni inissianut imaluunniit inissianut nammineq pigisanut allangortinneqarnerini attartortuni sinneruttut inatsisitigut inissisimanerat pillugu aalajangersakkat, Ineqarnermut maalaaruteqartarfiup piginnaatitaaffiinik erseqqissaaneq kiisalu aalajangersakkani ataasiakkaani teknikkikkut allannguutit.)

§ 1

Inissianik attartortitsisarneq pillugu Inatsisartut peqqussutaannut nr. 2-mut, 12. maj 2005-imeersumut makku allannguutigittinneqarput:

1. § 5, imm. 1, nr. 2-mi "§ 24, imm. 1", "§ 24, imm. 1 aamma § 24a, imm. 1."-imut allangortinneqassaaq.

2. § 11, imm. 1, imatut oqaasertalerneqassaaq:

"Sulisunut naalagaaffiup sullissiviini inissiamut innersuunneqarsinnaatitaallutik atorfeqartunut inissianik innersuussisarneq pillugu danskit naalagaaffiannut Naalakkersuisut Rigsombudi aqutugalugu isumaqatigiissuteqarsinnaapput."

3. § 15, imm. 2, atorunnaarsinneqarpoq.

Tamatuma kingorna imm. 3 imm. 2-inngortinneqarpoq.

4. § 21 imatut oqaasertalerneqassaaq:

" § 21. Attartortoq sulisunut inissiami najugaqartoq aammalu inissiamik attartortittakkamik nalinginnaasumik neqeroorfigineqartoq, sulisunut inissiaq najukkani inissianik nalinginnaasumik attartortitsisarnermi piumasaqaatit malillugit tigusinnaavaa, taamaattorli tak. imm. 4.

Imm. 2. Attartortoq ukiuni kingullerni arfineq marlunni sulisunut inissiami najugaqarsimasoq pisinnaatitaavoq sulisunut inissiaq najukkani inissiatut nalinginnaasumik attartortittakkatut tigussallugu, taamaattorli tak. 4.

Imm. 3. Attartortoq soraarninngunnginnermini ukiuni pingasuni kingullerni sulisunut inissiami najugaqarsimasoq pisinnaatitaavoq sulisunut inissiaq najukkani inissiatut nalinginnaasumik attartortittakkatut tigussallugu, taamaattorli tak. 4.

Imm. 4. Imm. 1-3 naapertorlugit pisinnaatitaaffik atuutissanngilaq:

1) Naalagaaffiit sullissiviisa ilaanni atorfeqartunut inissianut innersuunneqartunut, tak. § 11.

2) Inissianut Naalakkersuisoqarfanni ataasiakkaani Naalakkersuisunut ilaasortanut pisortanullu inniminnerneqarsimasunut.

3) Pisortanut inissianut, Namminersornerullutik Oqartussat qitiusumik allaffeqarfiani

immikkoortortani pisortanut inniminnerneqarsimasunut, tak. § 15.

4) Inissianut siunertanut aalajangersimasunut imaluunniit atorffinnut aalajangersimasunut inniminnerneqarsimasunut, tak. § 5, imm. 3."

5. § 24 imatut oqaasertalerneqassaaq:

" § 24. Namminersornerullutik Oqartussat imaluunniit kommunip inissiaataasa attartortittakkat ilaanni attartortut piginneqatigiilluni inissiaatillit peqatigiiffiannik pilersitsisimappata, aammalu inissianik attartukkaminik piginneqatigiilluni inissiatut tigusinissaminik Namminersornerullutik Oqartussanut imaluunniit kommunimut qinnuteqarsimappata, attartortitsisup §§5-imi aamma 65-imi aalajangersakkat sanioqqussinnaavaat. Piffissamit qinnuteqarfiusumit Namminersornerullutik Oqartussat imaluunniit kommunip piginneqatigiilluni inissiaatillit peqatigiiffiat inummik, piginneqatigiilluni inissiaatillit peqatigiiffiata utaqqisunut allattuiffiani allatsisimasumik inissiamut inueruttumut innersuussinissamut piginnaatissinnaavaa.

Imm. 2. Namminersornerullutik Oqartussat imaluunniit kommunip attartortoq, tak. imm. 1, inissiamik najukkaminik piginneqatigiilluni inissiatut tigusinissamik kissaateqanngitsoq illoqarfimmi najukkamini inissiamik najugaata taamaaqataanik neqeroorfigissavaa. Inissiaq a-ngissutsimigut neqeroorutip saqqummiunnerani inoqutigiinni inuit amerlassusaannut naapertuutissaaq, tak. § 6, imm. 2 aamma 3.

Imm. 3. Imm. 2 naapertorlugu inissiamut allamut innersuunneqarnissamut pisinnaatitaaffik taamaallaat atuutissaaq attartortup attartornermut isumaqatigiissut malissimappagu. Pissutsinik pingaaruteqangaanngitsunik imaluunniit attartortumit iluarsineqareersimasunik attartortitsisooq pissutissarsiorsinnaatitaanngilaq.

Imm. 4. Attartortup imm. 2 naapertorlugu neqeroorut allannguiniarluni sulinermit atatillugu akuerissappagu, attartortitsisup attartortoq nuuttussanngortoq nuunnermit atatillugu taarsiiffigissavaa, taakkulu tunngaviusumik aningaasartai 1.200 kr.-inik, kiisalu inimut najugaqarfiusumut ataatsimut 1.000 kr.-inik amerlassuseqartinneqassapput. Taarsiissutit aningaasartaat inaarutaasumik allannguinermit atatillugu aningaasartuutininut tamakkiisunut ilanngunneqassapput. Nuunneq kapitali 12-imi maleruagassat naapertorlugit ingerlanneqassaaq.

Imm. 5. Attartortup imm. 2 naapertorlugu neqeroorut akuerinngippagu attartorneq ingerlaannassaaq. Ukiumoortumik attartornermut akiliutip aalajangersarneqarnerani allaffissornermut akiliut 4.200 kr.-inik, illuutip tunniunneqarnerani aningaasaaliissutininut iluanaarutissat 1,5%-inik, kiisalu kvadratmeterimut ataatsimut ingerlatsinermit, aserfallatsaaliuinermit illuartitsinernullu akiliutit 405 kr.-inik annertussusilerneqassapput. Attartornermut akiliutip annertussusissaa ukiumi pineqartumi Inatsisartut aningaasanut inatsisaanni oqaasertaliussinikkut allanngortinneqarsinnaavoq.

Imm. 6. Attartorneq imm. 5 naapertorlugu ingerlatiinnarneqassappat, attartortup Namminersornerullutik Oqartussanut imaluunniit kommunimut pisinnaatitaaffii atuutinneqarsinnaasut taamaallaat tassaassapput, Namminersornerullutik Oqartussat imaluunniit kommunip piginneqataasutut piginneqatigiilluni inissiaatillit peqatigiiffiannut pisinnaatitaaffigisai.

Imm. 7. Attartortup inissiaq attartukkani piffissap qanorluunniit ilinerani piginneqatigiilluni inissiatut tigusinnaavaa."

6. § 24-p kingorna kapitali 2-mi ikkunneqassaaq:

" § 24a. Namminersornerullutik Oqartussat imaluunniit kommunii illuutaanni attartortittakkani

annerpaamik 16-inik inissartaqartuni attartortut affaat sinnerlugit inissiamik piginnittut peqatigiiffiannik pilersitsisimappata, aammalu inissianik attartortitakkanik inissiatut nammineq pigisatut tigusinissamik allakkatigut Namminersornerullutik Oqartussanut imaluunniit kommunimut qinnuteqaateqarsimappata, attartortitsisup §§ 5-imi aamma 65-imi aalajangersakkat sanioqqussinnaavai.

Imm. 2. § 24, imm. 2-7 taamatuttaaq inissianik attartortitakkanik inissiatut nammineq pigisatut allannngortinneqarnerinut atatillugu atuutissaaq, tak. im. 1

Imm. 3. Attartortup pissutsit imm. 1-imi taaneqartut saniatigut allanik peqquteqarluni inissiap attartukkami inissiatut nammineq pigisatut tigusinissaanik kissaateqarpat, illummi attartortut allat piumasaaqatit atuutereersut tunngavigalugit attartortutut inissisimaannassapput."

7. § 26, imm. 3 aamma 4, atorunnaarsinneqarput.

8. § 32-mi imm. 8-tut ikkunneqassaaq:

" Imm. 8. Attartortitsisup inissiaataasa inissisimaffiannut pitsanngorsaanissamut imaluunniit aningaasaleeqqinnissamut aningaasartuutininut matussutissanik attartortitsisoq Namminersornerullutik Oqartussat kommunillu ilaqutariinnut arlalinnut illuutaanni attartortunut akiliisitsisinnaavoq. Akiliutissap annertussusissaa ukiumi pineqartumi Inatsisartut aningaasanut inatsisaanni oqaasertaliussinikkut annertussusilerneqassaaq."

9. § 63, imm. 1-imi "taamaattorli tak. imm. 2-4" imatut allannngortinneqassaaq: "taamaattorli tak. imm. 2-5."

10. § 63-imi imm. 5-itut ikkunneqassaaq:

" Imm. 5. §§ 58-imi aamma 59-imi aalajangersakkat inissianut siunertanut aalajangersimasunut inniminnerneqarsimasunut, imaluunniit inissianut immikkut ittumik ilusilersugaasunut aammalu inissianut innarluutilinnut atugassannngortitaasunut atuutissanngillat."

11. § 65, imm. 1, imatut oqaasertalerneqassaaq:

"Sulisunut inissiamik attartorneq atorfeqarnerup unitsinneqarnerani atorunnaassaaq, tamatumunngalu atatillugu inissiaq qimanneqassalluni. Atorfilik pisussaavoq inissiaq allakkatigut taamaatissallugu. Atorfillip akiligassat ingerlaavartut attartornermut attuumassutillit, taamaatitsinissamut piffissarititaasup nalinginnaasup naanissaata tungaanut akiligassarai, taamaattorli tak. § 70, imm. 3."

12. § 73 imatut oqaasertalerneqassaaq:

" § 73. Inissiani attartortitakkani pisortanit pigineqartuni attartortitsisup ineqarnermut, imermut, kiassarnermut imaluunniit qularnaveeqqutissamut akiliutissanut akiliinngitsoornerup kingunerisaanik attartornermut isumaqatigiissut atorunnaarsissava, tak. §§ 37, imm. 1, 38, imm. 1, aamma 74, imm. 1. Inissiani attartortitakkani namminersortunit pigineqartuni attartortitsisup peqqutitut taaneqartut tunngavigalugit attartornermut isumaqatigiissut atorunnaarsissinnaavaa.

Imm. 2. Attartortitsisup attartornermut isumaqatigiissut atorunnaarsissinnaavaa:

1) Inissiaq unioqqutitsisumik atorneqarpat, tak. § 48, imm. 2 aamma 3.

2) Inissiaq ikerinnaannakkut qimanneqarpat, tak. § 48, imm. 5.

3) Inatsisini piumasarineqartut unioqqutillugit attartortitsisoq inissiamut isernissaanut itigartinneqarpat, tak. § 49, imm. 1.

4) Ileqqorissaarnissamut maleruagassat unioqqutinneqarpata, tak. § 50.

Imm. 3. Attartortitsisup aatsaat imm. 1 aamma 2 naapertorlugit attartorneq atorunnaarsissinnaavaapissutsit attartortumut assuarliutaasut annertuumik pingaaruteqarpata.

Imm. 4. Pissutsit imm. 1-imi aamma imm. 2-mi taaneqartut attartortitsisup tunngaviginiarsinnaangilai, pissutsit attartortitsisup attartornermut isumaqatigiissummik atorunnaarsitsinnginnerani aaqqinneqarsimappata.

Imm. 5. Attartortitsisup pissutsit imm. 2-mi taaneqartut tunngavigalugit attartornermik atorunnaarsitsinnginnerani attartortitsisup attartortoq pissutsit aaqpeqqullugit peqqussavaa.

Imm. 6. Attartortoq attartukkaminit anisinneqarpata, attartortitsisup kommunimi inunnik isumaginnittoqarfik tamanna pillugu ilisimatissavaa. Ilisimatitsinermi attartortitsisup anisitsinermit nalunaarutip assilineri nassitutissavaa.

13. § 81-imi imm. 4-p kingorna immikkoortoq nutaatut ikkunneqassaaq:

" Imm. 5. Namminersornerullutik Oqartussat imaluunniip kommunip imm. 1 naapertorlugu nakkutilliinera ilaatigut aningaasatigut ingerlatsinermik nakkutilliinermut ilaatigullu avataaniit aqutsisup allaffissornermi suliaasaanik allanik nakkutilliinermut tunngasuvoq."

Tamatuma kingunerisaanik imm. 5 imm. 6-inngussaaq.

14. § 84-imi imm. 5-itut ikkunneqassaaq:

" Imm. 5. Pissutsit imm. 1-imi taaneqartut pillugit maalaarutit Ineqarneq pillugu Maalaaruteqartarfiup saniatigut allaffissornermik oqartussaasunut allanut saqqummiunneqarsinnaangillat."

§ 2

Inatsisartut peqqussutaat 1. januar 2007-imi atuutilerpoq. § 1, nr. 4 aamma 5 piginneqatigiilluni inissiatillit peqatigiiffiinit aamma nammineq pigisanik inissiatillit peqatigiiffiinit ulloq atuutilerfissaq sioqqullugu pilersinneqarsimasunut atuutissanngillat.

Namminersornerullutik Oqartussat, ulloq 20. november 2006

Hans Enoksen

/

Jørgen Wæver Johansen